



partii naleraq

1.okt 2019

UKA2019/152

Suliffeqarfiit innuttaasunik tapersortarialinnik suliffissaqartitsisut nalunaarsugaasut pillugit Inatsisartut inatsisaat nr. xx, xx. xxx 2019-imeersoq (Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

Matumuuna inatsisissatut saqqummiunneqartoq Partii Naleqqamiit oqaaseqarfigissavarput tassanilu saqqummiunneqartumi soqutiginarluinnartut inuiaqatigiit tassalu innuttaasunik tapersortarialinnik inuiaqatigiinni ataatsimoortumik ikiuullutalu tapersersuinissarput pingaartutut isigalugu isummagut saqqumiutissavagut.

Siullermik una siunnersuut tungaveqarpoq inatsisartunut ilaasortaq Peter Olsen Inuit Ataqatigiit ukiakkut saqqummiussaa matumuuna inatsisissatut ilusilerlugu saqqummiunneqartoq assut iluarisimaaratsigu siunnersuuteqarsimasorlu nersualarusupparput.

Nunatsinni sulisinnaasut tamaasa atorfissaqartippagut tassa inuit tamarmik assigiimmik sapinngisamik periarfissinnissaat sumiluunniit sulinissaminnut assut pingaartikkipput oqaatigerusupparput.

Nunami maani suliffeqarfiit sulluunniit inuiaqatigiit ineriartornerannut sutigulluunnit tamatigut akisussaaqataasariaqartut Partii Naleqqamiit oqaatigissavarput.

Inuiaqatigiit tamatta aamma sumiluunniit ineriartornermi peqataanerunissarput pisussaaffigalugu tamakkiinerusumik peqataanissarput angusariaqalerparput. Sulisinnaasut peqqikkutta aamma sumiluunniit suliffinni suleqataalertariaqarpugut, imaassanngilarmi innuttaasut pisinnaasorpasuuqaluartut ilaatigut sulisussanik amigaateqalertaratta, uffa ilisimagaluarlugu sulisinnaasut amerlasuut aamma pigineqaraluartut.

Uanilu inatsissami saqqummiunneqartumi anguniarneqartoq tassalu suliffeqarfiit innuttaasunik tapersortarialinnik suliffissaqartitsisut anguniagaasoq assut iluarisimaaratsigu.

Tassami inuiaqatigiinni suliffeqarfiit aamma annertuumik pisussaaffeqarnissaat akisussaaqataanissaallu qulakkeerniartariaqarmat. Tassami taamaliornikkut aamma suliffiit akisussaaqataanerullutik pisussaaffeqarnerlutillu ingerlalnissaat anguneqarsinnaammat aamma inunnut sulinerikkut tapersortarialinnik sulisitsinissaq assut pingaartutut isigalugu ingerlanneqartariaqaleramat.

Inuttut naleqassuserput ilaatigut nakkangassutigisarparput ilaatigullu allaat misigisimalertarluta inuiaqatigiinni suleqataaniarluta suliffinnut qinnuteqartaraluarluta tiguneqassanata ilaatigullu maani

nunatsinni allaat misilittagaqanngitsutut inissinneqartarluta pineqartarnerput isumaqarluinnarpugut qimanneqartariaqalersoq.

Inuusuttorpassuit ilinniarsimasut taakkuupput aamma tapersersugassat inuiaqatigiit iluanni suliffissarsiornermikkut, tassami assersuutissarpassuaqarpugut ilinniarsimasutsikkut qaffasissumik inissisimasut tiguneqanngitsoortarlutik suliffissaaleqisut akornannut piinnartarput. Imaluunniit maani atorneqarusunnginnamik nunatsinniit aallaqqittariaqartarlutik tamannalu aamma aaqqittariaqarparput.

Uani innuttaasunik tapersersortariallit pillugit inatsisiliornarpugut, tamannalu ajunngilluinnarpoq tamakkiiisumillu tapersersorparput, inuiaqatigiit iluanni suliffeqarfiit ullumikkornit annerusumik peqataallutillu akisussaaqataasariaqarmata, innuttaasullu aamma periarfissaasa sulinerikkut pitsaangorsartariaqarmat pingaartumik tapersersortariallit sulinermi eqqarsaatigalugit.

Siunissami kalaaleqatitta ilinniareersimallutik nunatsinnut uternissaannut aamma Partii Naleqqamiit isumaqarluinnarpugut malittassanik sukaterisariaqarluta tassami ilumoorsinnaanngilaq maani sulerusukkaluartut tiguneqanngitsoortarnerat akerlianillu sulisussanik tikerartitsinnavilluta.

Inissaqarniarnikkut aaqqiiffigineqartariaqarput taavalu meeqqueriviit eqqarsaatigalugit ullumikkornit periarfissat pitsaanerulertariaqarput nunarput tamaat ataatsimut isigalugu.

Assersuutigalugu sooruna soorlu umiarsuit aqumiuinut malittarissaqartugut uffalu nunaqaviisuut naammattut pigalugit. Aningaasarsiornikkut imminnut kivinnerussagutta maani inuit pigeriikkagut periarfissiunniartigit, uagutsinnut ikiulaariarta immitsinnut salliutinnerulluta, soormi ilinniartitsissaagut atorumanagillu. Sumi nunami allami taamaattoqarami, ataatsimoorluta aaqqiniaqatigiinniarta.

Taamatut oqaaseqarluta inatsisissatut siunnersuut ataatsimiititaliami suliarineqarnissaa innersuussutigaarput.

Hans Enoksen